



Iacob dormant void en vision vne eschelle touchant au Ciel, & le Seigneur au sommet d'icelle, luy faisant promesse de benediction.

PRES que Rebecca fut aduertie de la haine qu'Esau portoit à son frere Iacob, elle moyenna enuers son mary, que Iacob fust enuoyé en Mesopotamie de Syrie. Isaac auant que d'enuoyer Iacob, le benit, & luy dit; Va en Mesopotamie chez Bathuel, le pere de ta mere, & là prens à femme des filles de Laban, frere de ta mere, & ne prens point des filles des Chananéens. Or Iacob partit de Bersabée pour aller en Haran: & estant arriué en vn lieu où il vouloit reposer, & le Soleil estant couché, il fit son cheuet des pierres qui estoient là, & les mit sous sa teste, & s'endormit. Lors il vid en songe vne eschelle dressée de la terre jusques au Ciel, où les Anges de Dieu montoient & descendoient; & le Seigneur estant appuyé au sommet de l'eschelle, qui luy disoit: Je suis le Dieu d'Abraham, & d'Isaac ton pere: je donneray la terre sur laquelle tu dors, à toy, & à ta semence, qui sera épandue par les quatre parties du monde; & toutes les lignées de la terre seront benites en toy. Iacob estant éveillé dit: Vrayement le Seigneur est en ce lieu, & je n'en scauois rien; & ayant peur dit: Que ce lieu-cy est épouventable! Ce n'est icy que la maison de Dieu, & la porte du Ciel. Et print la pierre de dessous sa teste, & la posa pour remarque, & versa de l'huile dessus, & appella ce lieu Bethel, qui auparauant auoit nom Lusa.